

KAAP AGULHAS MUNISIPALITEIT

VERORDENING INSAKE

DRANKHANDELSDAE EN -URE

Ingevolge die bepalings van artikel 156 van die Grondwet van die Republiek van Suid-Afrika, 1991 verorden die munisipale Raad van die Kaap Agulhas Munisipaliteit soos volg:

AANHEF

Nademaal artikel 156(1) van die Grondwet bepaal dat 'n Munisipaliteit uitvoerende gesag het ten opsigte van, en eie reg het op die administrasie van plaaslike regerings-aangeleenthede, soos die beheer oor ondernemings wat drank aan die publiek verkoop;

Nademaal artikel 156(2) van die Grondwet 'n munisipaliteit bemagtig om verordeninge uit te vaardig en te administreer vir die doeltreffende administrasie van die aangeleenthede wat hy die reg het om te administreer;

Nademaal die Wes-Kaapse Regering wetgewende bevoegdheid met betrekking tot dranklisensies het;

En nademaal die Wes-Kaapse Drankwet van 2007 bepaal dat 'n munisipaliteit handelsure in 'n verordening kan oplê;

WORD DAAR soos volg deur die Kaap Agulhas Munisipaliteit **VERORDEN** —

INHOUDSOPGAWE

HOOFSTUK 1: INTERPRETASIE EN TOEPASSING

1. Interpretasie
2. Toepassing
3. Algemene verbod
4. Bepaling van toepaslike ligging in 'n kategorie

HOOFSTUK 2: STANDAARD HANDELSURE

5. Handelsdae en -ure vir die verkoop en verbruik van drank op gelisensieerde persele
6. Handelsdae en -ure vir die verkoop van drank vir verbruik weg van gelisensieerde persele

HOOFSTUK 3: VERLENGING VAN HANDELSURE

7. Aansoek om verlenging van handelsure

HOOFSTUK 4: ALGEMENE BEPALINGS

8. Appèlle
9. Opskorting, wysiging en herroeping van verlengde drankhandelsure
10. Misdrywe en strawwe
11. Betekening van kennisgewings en ander dokumente
12. Teenstrydigheid tussen wetgewing
13. Herroeping van verordening
14. Bylae vorm deel van hierdie verordening
15. Kort titel
16. Datum van inwerkingstelling

BYLAE

HOOFSTUK 1

INTERPRETASIE EN TOEPASSING

1. INTERPRETASIE

In hierdie verordening sal die Engelse teks van toepassing wees in die geval van enige teenstrydigheid met die Afrikaanse teks, en tensy die konteks anders aandui beteken –

“algemene sakegebied” ’n gebied wat oorwegend vir algemene sake of enige ander gelykwaardige gebruik gesoneer is, met die doel om ekonomiese aktiwiteit in ’n sakedistrik of ’n ontwikkelingskorridor te bevorder, en wat ’n wye reeks grondgebruike soos sake-, residensiële en gemeenskapsgebruike insluit;

“die Wet” die Wes-Kaapse Drankwet, 2008 (Wet No. 4 van 2008), soos gewysig, en die regulasies wat daarkragtens uitgevaardig word;

“drank” enige vloeistof of stof, soos omskryf in artikel 1 van die Wes-Kaapse Drankwet, 2008 (Wet No. 4 van 2008), soos gewysig;

“dranklisensie” ’n lisensie om drank te verkoop, soos omskryf in artikel 33 van die Wes-Kaapse Drankwet, 2008 (Wet No. 4 van 2008), soos gewysig;

“drankowerheid” die Wes-Kaapse Drankowerheid wat ingestel is ingevolge subartikel 2(1) van die Wes-Kaapse Drankwet, 2008 (Wet No. 4 van 2008), soos gewysig;

“drinkplek” dieselfde as die omskrywing vir “kroeg”;

“gasteakkommodasie-onderneming” ’n perseel wat as tydelike residensiële akkommodasie gebruik word en slaapplek, maaltye (met behoorlike lisensiëring om voedsel voor te berei en verkoop) en ander gastedienste teen vergoeding aan verbygaande gaste verskaf, en sluit ’n oornagplek vir rugsakreisigers, ’n bed-en-ontbyt-onderneming, gastehuis en gasteplaas of -huisvesting, asook fasiliteite vir sakebyeenkomste, konferensies, geleenthede of opleidingsessies vir verbygaande gaste in, maar sluit ’n hotel uit;

“gelisensieerde perseel” die perseel waarop drank mikrovervaardig, verkoop, verbruik of geberg kan word, soos beoog ingevolge die Wes-Kaapse Drankwet, 2008 (Wet No. 4 van 2008), soos gewysig;

“gemagtigde beampte” enige werknemer van die Kaap Agulhas Munisipaliteit wat deur die Kaap Agulhas Munisipaliteit gemagtig is om die Verordening insake Drankhandelsdae en -ure van die Kaap Agulhas Munisipaliteit af te dwing, ’n aangewese drankbeampte van die Suid-Afrikaanse Polisie of ’n inspekteur aangestel ingevolge subartikel 73(4) van die Wes-Kaapse Drankwet, 2008 (Wet No. 4 van 2008), soos gewysig;

“gesoneer” ’n metode van ontwikkelingsbestuur wat die grondgebruiksaktiwiteite toelaatbaar op ’n perseel aanwys ingevolge bepalings en reëls om grond volgens gebruik en doel te kategoriseer, waarvan die omvang in die soneringskema-regulasie van die Kaap Agulhas Munisipaliteit vervat is, en **“sonering”** het ’n ooreenstemmende betekenis;

“hotel” ’n doelgeboude en ontwikkelde perseel wat as tydelike residensiële akkommodasie vir verbygaande gaste gebruik word en waar slaapplek, maaltye en ander gastedienste teen vergoeding verskaf word, en sluit in–

- (a) ’n restaurant of restaurante wat deel van die hotel uitmaak en behoorlik gelisensieer is om voedsel voor te berei;
- (b) konferensie- en vermaaklikheidsfasiliteite wat ondergeskik en aanvullend tot die oorheersende gebruik van die perseel as ’n hotel is;
- (c) perseel wat gelisensieer is om alkoholiese drank vir verbruik op die perseel te verkoop, maar sluit ’n buiteverbruiksfasiliteit, drankwinkel, gasteakkommodasie-onderneming, woonhuis of wooneenheid uit;

“industriële gebied” ’n gebied wat oorwegend vir algemene industriële gebruik of enige ander gelykwaardige gebruik gesoneer is, met die doel om alle vorms van industriële

aktiwiteit te akkommodeer, insluitend vervaardiging en verwante verwerkingsaktiwiteite, maar sluit industriële aktiwiteite uit wat skadelik (giftig) is of 'n gevaar inhou;

“kamerbediening” die bediening van drank en voedsel in die kamers van verbygaande gaste by fasiliteite waar tydelike residensiële akkommodasie verskaf word;

“kleinhoewegebied” 'n gebied wat oorwegend vir gebruik as kleinhoewe of enige ander gelykwaardige gebruik gesoneer is, met die doel om kleiner landelike eiendomme te akkommodeer wat gebruik kan word vir landbou-, kommersiële, ligte industriële en ander soortgelyke doeleindes, maar wat ook oorwegend as woonplekke in 'n meer landelike omgewing gebruik kan word;

“kroeg” 'n kleinhandelonderneming waarvan die primêre funksie die bediening van alkoholiese drank vir verbruik op die perseel is, maar wat ook voedsel kan voorsien as dit behoorlik daarvoor gelisensieer is, of wat vermaak aanbied;

“landbougebied” 'n gebied wat hoofsaaklik vir landbou of enige ander gelykwaardige gebruik gesoneer is, met die doel om landboubedrywighede op 'n plaas as 'n belangrike ekonomiese, omgewings- en kulturele hulpbron te bevorder en te beskerm, waar beperkte voorsiening gemaak word vir nie-landbougebruike om aan grondeienaars 'n geleentheid te bied om die ekonomiese potensiaal van hulle eiendomme te verhoog, sonder om 'n beduidende negatiewe impak op die primêre landboufunksies en -hulpbronne te veroorsaak;

“lisensiehouer” enige persoon of sakeonderneming of instansie aan wie 'n dranklisensie uitgereik is en wat gelisensieer is om drank te verkoop ingevolge die Wes-Kaapse Drankwet, 2008 (Wet No. 4 van 2008), soos gewysig, en sluit in enige gelisensieerde perseel, onderneming, drankwinkel of grondgebruiksaktiwiteit waarvandaan drank verkoop mag word, 'n persoon of 'n agent vir of namens die lisensiehouer of bestuurder van die lisensiehouer soos beoog in subartikel 52(1) van die Wes-Kaapse Drankwet, 2008 (Wet No. 4 van 2008), soos gewysig, of enige persoon in diens van sodanige lisensiehouer of agent of bestuurder;

“Munisipaliteit” Kaap Agulhas Munisipaliteit en sluit 'n verwysing na enige behoorlik gedelegeerde en/of aangewese amptenare en/of diensverskaffers ingevolge diensvlakoooreenkomste van die Kaap Agulhas Munisipaliteit in;

“perseel” enige gedeelte grond wat in die regsgebied van die Kaap Agulhas Munisipaliteit geleë is en waarvan die buitengrense op 'n algemene plan of diagram of deeltitelplan afgebaken is en wat kragtens toepaslike wetgewing geregistreer is, en sluit 'n gebou of struktuur in wat op sodanige grond gebou of opgerig is;

“plaaslike sake- of buurtsakegebied” 'n gebied wat oorwegend vir plaaslike sakegebruik of gemengde gebruik of enige ander gelykwaardige gebruik gesoneer is met die doel om lae-digtheid- kommersiële en gemengde-gebruik-aktiwiteite te akkommodeer wat voorsien in die behoeftes van plaaslike residensiële gebiede vir geriefsgoedere, persoonlike dienste of kleinskaalse sakeaktiwiteite, of wat dien as 'n koppel tussen algemene sake- en industriële gebiede, en aanliggende residensiële gebiede;

“residensiële gebied” 'n gebied wat oorwegend vir informele, enkel- of algemeen-residensiële gebruik of enige ander gelykwaardige gebruik gesoneer is, met die doel om oorwegend enkelgesin-wooneenhede in lae- tot medium-digtheid buurte te akkommodeer, asook hoër-digtheid huisvesting, en wat beheerde geleenthede vir tuiswerkverskaffing, bykomende wonings en lae-digtheid gemengde-gebruik-ontwikkeling insluit;

“restaurant” 'n behoorlik gelisensieerde onderneming wat voedsel voorberei en aan klante bedien en drank aan klante bedien en wat gewoonlik op die perseel voorberei, bedien en verbruik word, maar kan ook 'n diens vir wegneemetes en voedselaflewering insluit;

“sakeperseel” 'n eiendom waarvandaan sake bedryf word en kan 'n restaurant, drinkplek, kroeg of taverne of ander gebou vir soortgelyke gebuie insluit, maar sluit 'n plek van vermaak, gasteakkommodasie-onderneming, hotel, en sport- en gemeenskapsklub uit;

“soneringskema” die soneringskema van toepassing op en van krag vir ’n bepaalde gebied binne die regsgebied van die Kaap Agulhas Munisipaliteit.

“sport- en gemeenskapklub” ’n perseel of ’n fasiliteit wat gebruik word vir die byeenkoms van gemeenskap- of burgerlike organisasies of verenigings, sportklubs of ander maatskaplike of ontspanningsklubs en wat sonder winsbejag bedryf word, en kan gemeenskapsdiensklubs en gemeenskapsentrums of soortgelyke fasiliteite insluit, maar sluit nagklubs uit;

“taverne” dieselfde as die omskrywing vir “kroeg”;

“toerismefasiliteit” geriewe vir toeriste soos lesinglokale, restaurante wat behoorlik gelisensieer is om voedsel voor te berei en verkoop, winkels vir die verkoop van plaaslike drankprodukte en -opbrenge, geskenkwinkels en ruskamer, maar sluit nie oornagverblyf in nie.

“toeristefasiliteite” geriewe vir toeriste of besoekers soos lesinglokale, restaurante, geskenkwinkels, ruskamers of ontspanningsfasiliteite, maar sluit nie ’n hotel of oornagverblyf in nie;

“vermaaklikheidslokaal” ’n lokaal wat oorwegend vir kommersiële vermaak gebruik word en wat redelik groot getalle mense kan lok en akkommodeer, en wat buite normale sake-ure bedryf word of op ’n gereelde basis geraas weens musiek of brassery meebring, en sluit ’n bioskoop, teater, pretpark, danssaal, gimnasium, fasiliteit vir weddenskappe, dobbelsaal, casino, karaoke-kroeg en nagklub in;

“vonkelwyn” ’n bruiswyn wat ontstaan as gevolg van die gisting van druive, hetsy deur natuurlike of kunsmatige prosesse, en sluit sjampanje in;

“wynmakery” persele of fasiliteite wat gebruik word in die vervaardiging van wyn en ander alkoholiese drank uit vrugte of ander landbouprodukte; en sodanige persele of fasiliteite kan fasiliteite insluit vir die pars van druive of soortgelyke landbouprodukte, gisting en veroudering van wyn of soortgelyke produkte, proelokale, vat- en bergingskamers, bottelingskamers, tenkkamers, laboratoriums of kantore en ander bykomstige of aanvullende fasiliteite wat met die produksie van wyn of alkoholiese drank verband hou, waarby ingesluit –

- (a) restaurante en ander voedseldienste wat behoorlik gelisensieer is om voedsel voor te berei en te verkoop;
- (b) vermaak- en konferensiefasiliteite;
- (c) bruiloflokale;
- (d) verkooppunte waar die produkte van die landgoed verkoop word; of
- (e) geaffilieerde kleinhandelfasiliteite vir toere of besoekers;

2. TOEPASSING

Hierdie verordening is van toepassing op persone en persele wat binne die regsgebied van die Munisipaliteit drank aan die publiek verkoop.

3. ALGEMENE VERBOD

’n Lisensiehouer mag nie drank vir verbruik op of weg van ’n gelisensieerde perseel verkoop–

- (a) op enige ander wyse as ingevolge hierdie verordening nie;
- (b) buite die dae en ure wat deur die Munisipaliteit bepaal is nie; of
- (c) sonder ’n geldige dranklisensie wat uitgereik is, soos beoog in die Wet nie.

4. BEPALING VAN TOEPASLIKE LIGGING IN ’N KATEGORIE

Waar die liggingskategorie soos in die Bylae uiteengesit onduidelik of betwis word of moeilik is om te bepaal, of waar persele in gebiede nie eenvormig gesoneer is nie, sal die werklike regte wat deur sonering, vergunningsgebruik of afwyking gevestig is, voorrang geniet ten einde die toepaslike kategorie te bepaal.

HOOFSTUK 2

STANDAARD HANDELSURE

5. HANDELSDAE EN -URE VIR DIE VERKOOP EN VERBRUIK VAN DRANK OP GELISENSIEERDE PERSELE

- (1) 'n Lisensiehouer kan op die volgende dae en ure drank vir verbruik op 'n gelisensieerde perseel verkoop—
 - (a) op enige dag van die week; en
 - (b) gedurende die handelsure soos in die Bylae uiteengesit.
- (2) Nieteenstaande die bepalings van subartikel 5(1) van hierdie verordening, kan 'n hotel of gasteakkommodasie-onderneming wat gelisensieer is om drank te verkoop, enige tyd van die dag 'n kamerdiensfasiliteit aanbied.
- (3) Nieteenstaande die bepalings van hierdie verordening, kan 'n lisensiehouer soos beoog in subartikel 5(1) van hierdie verordening, bruiswyn slegs bedien—
 - (a) van 08:00 tot 11:00 vir sewe dae 'n week;
 - (b) as deel van 'n maaltyd; en
 - (c) aan gaste wat deelneem aan 'n georganiseerde funksie waar toegang beheer word.
- (4) Die handelsdae en -ure vir die verkoop en verbruik van drank by enige spesiale geleenthede of tydelik gelisensieerde persele sal volgens die Bylae wees.
- (5) 'n Gelisensieerde casino kan drank vir 24 uur 'n dag en 7 dae 'n week verkoop.
- (6) 'n Lisensiehouer wat drank vir verbruik op die gelisensieerde perseel verkoop—
 - (a) mag nie enige verbruik of drank op die gelisensieerde perseel toelaat op enige tyd wat die verkoop van drank op die perseel nie toegelaat word nie; en
 - (b) mag nie toelaat dat enige drank van die gelisensieerde perseel af weggeneem word nie.
- (7) 'n Lisensiehouer ten opsigte van 'n hotel of gasteakkommodasie-onderneming—
 - (a) kan toegang voorsien tot 'n bevoorrade kroegfasiliteit binne 'n privaat suite of kamer vir verbruik deur 'n gas wat sodanige privaat suite of kamer bewoon; en
 - (b) kan nie sodanige kroegfasiliteit se voorraad aanvul gedurende die ure wat die lisensiehouer nie toegelaat word om drank te verkoop nie.
- (8) 'n Lisensiehouer ten opsigte van 'n hotel of gasteakkommodasie-onderneming kan nie buite die standaard handelsure vir sodanige soort gelisensieerde perseel drank aan gaste of besoekers verskaf nie, tensy sodanige drank verskaf word ingevolge die bepalings van subartikel 5(2) en subartikel 5(3) van hierdie verordening.
- (9) 'n Lisensiehouer kan 'n aansoek by die Munisipaliteit indien vir permanent verlengde handelsure om drank vir verbruik op 'n gelisensieerde perseel tot 04:00 die volgende dag te verkoop, op voorwaarde dat die lisensiehouer 'n geldige dranklisensie vir die betrokke perseel het.

6. HANDELSDAE EN -URE VIR DIE VERKOOP VAN DRANK VIR VERBRUIK WEG VAN GELISENSIEERDE PERSELE

- (1) 'n Lisensiehouer vir verbruik van drank weg van 'n gelisensieerde perseel kan op enige dag van die week drank verkoop, behalwe dat geen drank op 'n Sondag verkoop mag word nie.

- (2) 'n Lisensiehouer wat 'n toeristefasiliteit bedryf kan, ongeag die bepalinge van subartikel 6(1) van hierdie verordening, drank vir verbruik weg van die gelisensieerde perseel op enige dag van die week van 09:00 tot 18:00 verkoop.
- (3) 'n Lisensiehouer kan op die volgende dae en ure drank vir verbruik weg van die gelisensieerde persele verkoop:
 - (a) Maandag tot Vrydag 09:00 tot 18:00;
 - (b) Saterdag van 09:00 tot 18:00; en
 - (c) Geen handel word op Sondag en Kersdag toegelaat nie, met dien verstande dat hierdie beperking nie sal geld vir 'n wynmakery en 'n toerismefasiliteit wat van 09:00 tot 18:00 op hierdie dag mag handel nie.
- (4) 'n Lisensiehouer kan 'n aansoek by die Munisipaliteit indien vir permanent verlengde handelsure om drank vanaf 'n gelisensieerde perseel tot 20:00 te verkoop, op voorwaarde dat die lisensiehouer 'n geldige dranklisensie vir die betrokke perseel het.

HOOFSTUK 3

VERLENGING VAN HANDELSURE

7. AANSOEK OM VERLENGING VAN HANDELSURE

- (1) 'n Lisensiehouer kan 'n skriftelike aansoek by die Munisipaliteit indien om die handelsure vir 'n spesifieke soort lisensie of kategorie van sakeperseel te verleng, onderworpe aan die volgende voorwaardes—
 - (a) in die geval van 'n lisensiehouer wat drank vir verbruik weg van 'n gelisensieerde perseel verkoop, vir 'n oopmaaktyd van 09:00 tot 'n sluitingstyd van 20:00; en
 - (b) in die geval van 'n lisensiehouer wat drank vir verbruik op 'n gelisensieerde perseel verkoop, vir 'n oopmaaktyd van 11:00 tot 'n sluitingstyd van 04:00.
 - (c) verlengde handelsure kan volgens aansoek toegestaan word aan 'n aansoeker—
 - (i) as permanente vergunning met dien verstande dat die lisensiehouer 'n geldige dranklisensie vir die betrokke perseel het;
 - (ii) vir 'n tydperk van een (1) kalenderjaar;
 - (iii) vir enige tydperk korter as een (1) kalendermaand; en
 - (iv) vir 'n spesiale geleentheid.
- (2) Die Munisipaliteit kan 'n aansoek om verlenging van handelsure goedkeur of gedeeltelik goedkeur of weier, en enige aansoeker sal die reg tot appèl het ingevolge die bepaling van artikel 8 van hierdie verordening.
- (4) Geen regte vir verlengde handelsure sal 'n aansoeker toeval totdat die skriftelike goedkeuring deur die Munisipaliteit ontvang is nie.
- (5) Die Munisipaliteit kan, met skriftelike kennisgewing aan die aansoeker, voorwaardes vir handel gedurende verlengde ure oplê, op voorwaarde dat sodanige opgelegde voorwaardes konsekwent, billik en regverdig vir alle aansoeke is en dat geen presedente geskep word nie.
- (6) Voordat die Munisipaliteit 'n aansoek om die verlenging van handelsure oorweeg, moet 'n aansoeker die volgende inligting en stawende dokumente aan die Munisipaliteit voorsien—
 - (a) die uitkoms van samesprekings met eienaars en inwoners van persele aanliggend aan die gelisensieerde perseel, wat deur die aansoek geraak sal word;
 - (b) die potensiële impak op die omliggende omgewing;
 - (c) die nabyheid van die gelisensieerde perseel aan omliggende residensiële gebiede, en kulturele, godsdienstige en opvoedkundige fasiliteite;
 - (d) die bepaalde tydperk waarvoor die aansoek ingedien word, of dat die aansoek om permanent verlengde handelsure ingedien word;
 - (e) vorige lisensie-opskortings, lisensiewysigings of herroeping van aansoeke om verlengde handelsure vir dieselfde gelisensieerde perseel;
 - (f) die redes waarom dit in die publiek se belang is om 'n verlenging van handelsure goed te keur en/of toe te staan;
 - (g) motiverings wat die volgende insluit—
 - (i) die impak van die risiko's en oorlaste vir die omliggende grondeienaars, inwoners en okkupeerders van persele; en

- (ii) versagende maatreëls om met die beheer en voorkoming van risiko's en/of oortolste te help;
 - (h) die munisipale soneringsvereistes en -voorwaardes van die gelisensieerde perseel;
 - (i) bewys van die geldigheid van die huidige dranklisensie, en dat die munisipale rekening vir die betrokke perseel in geheel vereffen is;
 - (j) die kommentaar op en aanbevelings vir die aansoek van die Wes-Kaapse Drankowerheid, die Drankbeampte van die Suid-Afrikaanse Polisie en die Munisipaliteit se Departement Wetstoepassing; en
 - (k) waar van toepassing, die geldigheid van enige ander sakelisensie.
- (7) Die Munisipaliteit kan enige goedkeuring vir die verlenging van drankhandelsure terugtrek waar 'n lisensiehouer nie aan die voorwaardes vir die verlenging voldoen nie of wanneer daar aan die Munisipaliteit bewys gelewer word dat die verlengde handelsure nie meer geskik is nie.

HOOFSTUK 4

ALGEMENE BEPALINGS

8. APPÈLLE

'n Persoon wie se regte deur 'n besluit van die Munisipaliteit ingevolge enige gedelegeerde bevoegdheid geraak word, kan ingevolge artikel 62 van die Wet op Plaaslike Regering: Munisipale Stelsels, 2000 (Wet No. 32 van 2000), soos gewysig, appèl aanteken deur skriftelike kennisgewing van die appèl teen die besluit en die redes vir die appèl binne een en twintig (21) dae ná die datum van die kennisgewing van die besluit aan die Munisipale Bestuurder voor te lê.

9. OPSKORTING, WYSIGING EN HERROEPING VAN VERLENGDE DRANKHANDELSURE

- (1) 'n Gemagtigde amptenaar mag, met betekening van 'n skriftelike kennisgewing aan die lisensiehouer of persoon in beheer van 'n gelisensieerde perseel, onmiddellik die verlengde handelsure van 'n lisensiehouer opskort vir die nienakoming van die bepalings van die Wet of die bepalings van hierdie verordening, of vir enige voorwaarde van die dranklisensie of die verlengde handelsure se goedkeuring wat nie nagekom word nie.
- (2) Die skriftelike kennisgewing soos beoog in subartikel 9(1) van hierdie verordening moet die redes aandui vir die opskorting en die tydraamwerke ingevolge waarvan sodanige opskorting van verlengde handelsure van toepassing sal wees.
- (3) Die skriftelike kennisgewing soos beoog in subartikel 9(1) van hierdie verordening sal aan die lisensiehouer opdrag gee om binne twee en sewentig (72) uur skriftelike redes aan die Munisipaliteit te voorsien oor waarom die verlengde handelsure nie ten volle herroep moet word nie.
- (4) Die gemagtigde amptenaar sal enige opskorting van verlengde drankhandelsure skriftelik by die gedelegeerde bevoegdheid of owerheid aanmeld.
- (5) Die Munisipaliteit sal, na oorweging van die gemagtigde amptenaar se verslag oor die opskorting en die verhoër deur die lisensiehouer—
 - (a) die handelsure ten opsigte van die betrokke sakeperseel herbevestig, wysig of herroep, soos van toepassing, en kan sodanige bykomende voorwaardes oplê as wat die Munisipaliteit nodig ag; en
 - (b) enige besluit om die verlengde ure van handel te bevestig, wysig of herroep, by die Wes-Kaapse Drankowerheid aanmeld.
- (6) Geen lisensiehouer sal gedurende sodanige tydperk waarin die verlengde ure van handel in drank opgeskort is, voortgaan om drank aan die publiek te verkoop nie.
- (7) Die Munisipaliteit sal nie aanspreeklik gehou word vir enige verlies aan inkomste wat deur 'n lisensiehouer gely word gedurende enige tydperk van die opskorting van handelsure nie.

10. OORTREDINGS EN BOETES

Enige persoon wat die bepalings van hierdie verordening oortree of versuim om dit na te kom, of wat versuim om te voldoen aan 'n kennisgewing wat ingevolge hierdie verordening beteken word, of versuim om te voldoen aan 'n opdrag van 'n gemagtigde amptenaar of 'n opdrag wat op 'n kennisgewingbord geplaas is, is skuldig aan 'n misdryf en is by skuldigbevinding aanspreeklik vir—

- (a) 'n boete of tronkstraf, of aan sodanige gevangenisstraf sonder die opsie van 'n boete, of aan sodanige boete sowel as sodanige tronkstraf;
- (b) in die geval van 'n agtereenvolgende of volgehoue misdryf, aan 'n bykomende boete of 'n bykomende tydperk van tronkstraf, of sodanige bykomende tronkstraf sonder die opsie van 'n boete, of aan sodanige bykomende boete sowel as sodanige bykomende tronkstraf, vir elke dag wat sodanige misdryf voortduur; en
- (c) enige verdere bedrag as 'n hofbevel vir koste, gelyk aan enige koste en uitgawes wat na die hof se mening as gevolg van sodanige misdrywe deur die munisipaliteit aangegaan is.

11. BETEKENING VAN KENNISGEWINGS EN ANDER DOKUMENTE

- (1) 'n Kennisgewing, opdrag, aanmaningsbrief of ander dokument wat ingevolge hierdie verordening deur die Munisipaliteit uitgereik word, word geag as behoorlik uitgereik wanneer 'n behoorlik gedelegeerde amptenaar of die Munisipaliteit dit onderteken het.
- (2) Enige kennisgewing, opdrag, aanmaningsbrief of ander dokument wat ingevolge hierdie verordening aan 'n persoon beteken word, word geag as behoorlik en effektief beteken–
 - (a) wanneer dit persoonlik by daardie persoon afgelewer is;
 - (b) wanneer dit by daardie persoon se woonplek of besigheid in die Republiek van Suid-Afrika gelos is by 'n persoon wat klaarblyklik ouer as sestien jaar is;
 - (c) wanneer dit per geregistreerde of gesertifiseerde pos na daardie persoon se laaste bekende woonadres of sake-adres in die Republiek van Suid-Afrika gepos is, en bewys van die pos daarvan gelewer word;
 - (d) As daardie persoon se adres in die Republiek van Suid-Afrika onbekend is, wanneer dit aan daardie persoon se agent of verteenwoordiger in die Republiek van Suid-Afrika beteken is op 'n wyse waarvoor daar in subartikels 11(2)(a), 11(2)(b) of 11(2)(c) van hierdie verordening voorsiening gemaak is;
 - (e) As daardie persoon se adres en agent of verteenwoordiger in die Republiek van Suid-Afrika onbekend is, wanneer dit geplaas is op 'n opsigtelike plek op die eiendom of perseel waarmee dit verband hou; of
 - (f) In die geval van 'n regspersoon, wanneer dit by die geregistreerde kantoor of die sakeperseel van die regspersoon afgelewer is.
- (3) Wanneer enige kennisgewing, opdrag, aanmaningsbrief of ander dokument kragtens hierdie verordening aan 'n persoon beteken word, is dit voldoende vir die doel van die betekening van die kennisgewing, opdrag, aanmaningsbrief of ander dokumente om die persoon in die kennisgewing, opdrag, aanmaningsbrief of ander dokumente beskryf as die eienaar, okkupeerder of houer van die eiendom of regte ter sprake, en dit is nie 'n vereiste om daardie persoon by die naam te noem nie.
- (4) 'n Kennisgewing, opdrag, aanmaningsbrief of ander dokument sal vir die doel van bekragtiging behoorlik deur die Munisipaliteit onderteken word.

12. TEENSTRYDIGHEID TUSSEN WETGEWING

Wanneer enige bepaling van hierdie verordening strydig is met nasionale en provinsiale wetgewing of regulasies, sal die nasionale en provinsiale wetgewing of regulasies van toepassing wees.

13. HERROEPING VAN VERORDENINGE

- (1) Die bepalings van enige verordeninge wat voorheen deur die Munisipaliteit of enige van die afgestelde munisipaliteite wat nou by die munisipaliteit ingelyf is, uitgevaardig is, word hiermee herroep sover dit verband hou met aangeleenthede waarvoor daar in hierdie verordening voorsiening gemaak word.
- (2) Die volgende verordening van die Kaap Agulhas Munisipaliteit word spesifiek hiermee herroep–

Naam van verordening	Datum uitgevaardig	As 'n geheel of gedeeltelik
Verordening insake drankhandelsdae en -ure	PG 7155 gedateer 2 Augustus 2013	As 'n geheel

14. BYLAE VORM DEEL VAN HIERDIE VERORDENING

Die Bylae tot hierdie verordening vorm deel van die verordening vir alle praktiese toepassings.

15. KORT TITEL

Hierdie verordening se naam is die Verordening insake Drankhandelsdae en -ure van die Kaap Agulhas Munisipaliteit.

16. DATUM VAN INWERKINGSTELLING

Hierdie verordening sal in werking tree op die dag van uitvaardiging.

BYLAE

HANDELSDAE EN -URE VIR VERBRUIK VAN DRANK OP GELISENSIEERDE PERSELE

Liggingskategorie en soort gelisensieerde perseel	Maksimum toegelate handelsure
1. Residensiële gebiede	
Gasteakkommodasie-onderneming	Maandag – Saterdag: 11:00 – 24:00 Sondag: 11:00 – 24:00
Plek van vermaak	
Drinkplek / Taverne / Restaurant	
Kroeg	
Perseel vir sake gesoneer	Maandag – Saterdag 11:00 – 24:00
Sport- en gemeenskapsklub (buiten spesiale geleenthede wat tydelike lisensies benodig)	Maandag – Saterdag: 11:00 – 24:00 Sondag: 11:00 – 24:00
Hotel	Maandag – Saterdag: 11:00 – 02:00 die volgende dag Sondag: 11:00 – 24:00
2. Plaaslike- of buurtsakegebiede – insluitend gemengde-gebruik-gebiede	
Gasteakkommodasie-onderneming	Maandag – Saterdag: 11:00 – 24:00 Sondag: 11:00 – 24:00
Drinkplek / Taverne / Restaurant	
Kroeg	
Plek van vermaak	
Perseel vir sake gesoneer	Maandag – Saterdag 11:00 – 24:00
Sport- en gemeenskapsklub (buiten spesiale geleenthede wat tydelike lisensies benodig)	Maandag – Saterdag: 11:00 – 24:00 Sondag: 11:00 – 24:00
Hotel	Maandag – Saterdag: 11:00 – 02:00 die volgende dag Sondag: 11:00 – 24:00
3. Algemene sakegebiede	
Gasteakkommodasie-onderneming	Maandag – Saterdag: 11:00 – 02:00 die volgende dag Sondag: 11:00 – 24:00
Drinkplek / Kroeg / Taverne / Restaurant	
Plek van vermaak	
Hotel	
Perseel vir sake gesoneer	Maandag – Sondag 11:00 – 24:00
Sport- en gemeenskapsklub (buiten spesiale geleenthede wat tydelike lisensies benodig)	Maandag – Saterdag: 11:00 – 02:00 die volgende dag Sondag: 11:00 – 24:00

4. Industriële gebiede	
Perseel vir sake gesoneer	Maandag – Saterdag: 11:00 – 02:00 die volgende dag Sondag: 11:00 – 24:00
Plek van vermaak	
Sport- en gemeenskapsklub (buiten spesiale geleenthede wat tydelike lisensies benodig)	Maandag – Saterdag: 11:00 – 02:00 die volgende dag Sondag: 11:00 – 24:00
5. Landbou- / landelike gebiede	
Gasteakkommodasie-onderneming	Maandag – Saterdag: 11:00 – 02:00 die volgende dag Sondag: 11:00 – 24:00
Plek van vermaak	
Wynmakery / Toerismefasiliteite	
Hotel	
Perseel vir sake gesoneer	Maandag – Sondag 11:00 – 24:00
Sport- en gemeenskapsklub (buiten spesiale geleenthede wat lisensies benodig)	Maandag – Saterdag: 11:00 – 02:00 die volgende dag Sondag: 11:00 – 24:00
6. Kleinhoewegebiede	
Gasteakkommodasie-onderneming	Maandag – Sondag 11:00 – 24:00
Plek van vermaak	
Wynmakery / Toerismefasiliteite	
Sport- en gemeenskapsklub (buiten spesiale geleenthede wat tydelike lisensies benodig)	Maandag – Sondag 11:00 – 24:00
Persele wat vir sake gesoneer is	Maandag – Sondag 11:00 – 24:00
7. Ander ad-hoc-liggings	
Voertuie of mobiele ondernemings wat vir toeriste- of vermaak- of ontspanningsdoeleindes gebruik word, soos omskryf onder "perseel" in artikel 1 van die Wet, behalwe waar enige ander verordening van Kaap Agulhas Munisipaliteit anders bepaal.	Maandag – Sondag 11:00 – 24:00
Spesiale geleenthede of tydelik gelisensieerde persele	Soos bepaal deur liggingskategorie
8. Spesiale geleenthede	
	Soos bepaal deur die kategorie van die lisensie en sonering van die perseel